

浮山縣志卷之三十九

雜志

邑乘一書允有關於茲土者既已分類詳記矣若夫事近荒誕載在簡編探奇者亦每津津而樂道之爰博採廣收另為一帙當作齊諧觀並以佐譚鋒云爾志雜志

高辛妃訾氏八夢日而生八子號八元實沉闕伯居曠林干戈

日尋后帝不臧遷闕於宋是為商沉於大夏是為參異苑

高辛時丹邱之國獻瑪瑙甕以盛甘露甕至堯時猶存甘露盈

而不竭以頌羣臣舜時漸減遷寶甕於衡山臨汾縣志

堯寄於伊長孺家從母所居故姓伊耆宜齋野乘

浮山縣志卷三十九 雜志

一

堯登山山湧一泉味如醴色如玉漿號曰醴泉酒譜

帝堯帝嚳之子姓伊祁氏年十五佐兄摯封唐侯二十即帝位

始封於唐故號陶唐今唐縣定州境以唐水名也其曰順德

唐山者訛

帝堯臺帝嚳臺丹朱臺帝堯臺各一臺四方在崑崙東北相傳

天子巡狩所經過夷狄慕聖人恩德輒共為築立臺觀以標

顯其遺跡也夫以丹朱之名與三大聖並其見重於遠人如

此山海經

禹貢八州皆有貢物而冀州獨無之冀即今之山四土瘠天寒

生物鮮少蓋自古為然燕間錄

趙氏之先與秦共祖至蜚廉子季勝生孟增是爲宅臯狼臯狼孫造父御穆王有功賜以趙城由此爲趙氏造父以下六世至奄父生叔帶去周如晉事晉文侯始居晉國五世而生趙夙晉獻公十六年滅耿霍魏賜夙耿夙生共孟共孟子趙衰事文公爲原大夫居原歷盾朔武景叔四世生鞅是爲簡子晉頃公十二年分祁氏羊舌氏邑爲十縣各令其族爲之大夫鞅卒次子無恤立是爲襄子襄子元年平代地封鞅長子伯魯子周爲代成君四年與智伯韓魏盡分范中行地復與韓魏滅智伯分其地於是趙北有代南并智氏疆於韓魏襄子卒代成君子浣立是爲獻侯治中牟始列爲諸侯襄子弟

浮山縣志

卷三十九

雜志

一一

桓子逐獻侯自立於代一年卒國人復迎立獻侯三傳至敬侯始都邯鄲敬侯九年與韓魏共分晉地歷成侯昭侯至武靈王攘地北至燕代西至雲中九原二十七年立子何爲王是爲惠文王自稱主父惠文王二年主父出代西遇樓煩王於西河而致其兵封長子章爲代安陽君四年李兌平章之亂又二傳至幽繆王降秦

魏之先畢公高之後畢萬事晉獻公獻公滅魏封之從其國名爲魏氏萬子武子事文公襲魏氏之後列爲大夫治於魏子悼子徙治霍牛魏絳晉悼公十一年絳徙安邑絳後五世爲魏桓子與韓趙共滅智伯分其地桓子之孫曰文侯斯文侯

二十一年列爲諸侯子武侯擊十一年與韓趙三分晉子惠王營三十一年徙治大梁歷襄哀昭安釐景湣假六世滅於秦

韓之先與周同姓其後裔事晉封於韓原曰韓武子武子後三世有韓獻子厥從封姓韓氏子宣徙居州晉頃公十二年與趙魏共分祁氏羊舌氏十縣宣子子貞子徙居平陽至孫康子與趙魏共敗智伯分其地地益大於諸侯康子孫景侯六年與趙魏胥爲諸侯歷三世爲哀侯哀侯元年與趙魏分晉國二年徙都鄭傳懿昭宣惠襄釐桓惠暨王安七世安虜於秦

浮山縣志

卷三十九

雜志

三

甘露三年上思股肱之美乃圖畫其人於麒麟閣唯霍光不名

曰大司馬大將軍博陸侯姓霍氏

以上三段
西漢書

霍光妻遺淳于衍蒲桃錦二十四疋散花綾二十五疋綾出鉅鹿陳寶光家寶光妻傳其法霍顯召八其第使作之機用一百二十鑷六十日成一疋正直萬錢又與走珠一排絲綾百端錢百萬黃金百兩爲起第宅奴婢不可勝數衍猶怒曰我爲爾成何功而報我若是

西京雜志

霍光園中鑿大池植五色睡蓮養鴛鴦三十六對望之爛若披

錦故相逢行曰鴛鴦七十二羅列自成行

真率筆記

金山忠烈王漢博陸侯姓霍氏吳孫權時一日致疾黃門小豎

附語曰國主封界華亭谷極西南有金山鹹塘湖爲民害民將魚斃食之非人力能防金山故海鹽縣一旦陷沒爲湖無大神護也臣漢之功臣霍某也部黨有力能鎮之可立廟於山吳王乃立廟建炎間建行宮於當湖賜名顯應尤著鄉民祈禱輒應部下錢侯尤爲靈著王以四月十八誕辰浙之東西商賈舟楫朝獻踵至自入四月至中旬末一市爲之鼎沸聞有設祭於松栢間祀其先亡慟哭而反謂之小嶽廟廟中鐵鑄四聖由海而來至今見存

括異志

天福初桑維翰以翰林學士尙書禮部侍郎知樞院事知院之名始此

晉書

浮山縣志

卷三十九

雜志

四

桑維翰爲相常惡獲鹿賈緯待之甚薄漢隱帝時詔緯與王申竇儼等同修晉高祖出帝漢高祖實錄緯爲維翰傳言維翰死有銀八千錠翰林學士徐台符以爲不可數以非緯緯不得已更爲數千錠

賈緯傳

桑維翰壽辰韋潛德獻太湖石一塊上有鐫字金飾曰寵仙

清異

錄

雍熙二年始置翰林侍讀學士以邢昺爲之

宋史

景德四年以翰林侍講知曹州侍講學士外使自昺始焉自五代以來凡樞密院官皆文武叅用大中祥符七年以王祠宗曹利用並爲檢校太保充樞密副使亦不帶正官編修之名

古無之慶歷四年史館王洙都承旨單士甯編修樞密院例冊編修之名自此始

三隅書屋在城內進士巷張氏昆仲下帷處也兄永諧弟永鑑永鏐壘簾鼎峙互相師友日夜攻苦其中天資既邁學力兼優故其爲文皆自出機杼不落恒蹊每出一藝必爲宗工所賞當時有清河三鳳之目厥後永鑑成進士永鏐登賢書而永諧以英年碩學僅博一芹遂赴玉樓之召人尤惜之所著有二隅書屋時文合稿付梓行世